



Publicaziuns officialas dils 15-03-2019

Damondas da baghegiar

Nr. 09/2019

Datum da publicaziun: 15-03-2018

Patrun: Hug Beat e Renata, 6300 Zug

Representant: spacial design, 7166 Trun

Liug e parcelas: Caho sur Via; 78

Object: engmondaziun da duas finiastras encunter ost

Ils profils ein tschentai ed ils plans da construcziun ein deponi tier la canzlia communal.
L'investa publica cuozza 20 dis dapi il datum da publicaziun.

Eventualas protestas encunter sura damonda da baghegiar ein d'inoltrar alla cumissiun da baghegiar Sumvitg enteifer 20 dis dapi il datum da publicaziun.

Sumvitg, 15-03-2019

Cumissiun da baghegiar

ELECZIUNS COMMUNALAS 2019

Demissiuns d'uffecis

Sin fundament d'art. 19 dalla lescha da votaziuns ed elecziuns han ils suandonts officials communalns inoltrau lur demissiun sin ils 31 da schaner:

a) Cumissiun da quen e gestiun

Cajacob Claudio, Cumpadials	president
Decurtins Rafael, Sumvitg	commember
Lutz Gion, Rabius	commember

b) Cumissiun da baghegiar

Bundi Martin, Sumvitg	president
Flepp Felix, Surrein	commember

Officials che han buca demissiunau

Ils suandonts officials han buca demissiunau e valan consequentamein sco proponi tenor art. 21 dalla lescha da votaziuns ed elecziuns:

a) President communal

Candinas Armin, Rabius

b) Suprastonza communal

Bearth Giusep, Sumvitg
Candinas Robert, Surrein
Deplazes Ignaz, Surrein
Duff Marcus, Cumpadials

c) Cumissiun da baghegiar

Monn Erwin, Sumvitg
Tuor Eduard, Rabius

Ponderaziuns e motivs dalla suprastonza communal da star vinavon a disposiziun per l'executiva

Dapi biabein quater meins ei la suprastonza communal en stretg contact cun la suprastonza communal da Trun pertuccont in project da fusiun che las suprastonzas communalas da Trun e Sumvitg han decidiu da lantschar en ina seduta comunabla dils 21 da schaner 2019. Las discussiuns preparatoricas enteifer la suprastonza communal e cun la suprastonza communal da Trun han mussau ch'igl ei prudent che la suprastonza communal vertenta elaborescha il project da fusiun cun la vischnaunca Trun. Plinavon ha igl uffeci da vischnauncas cussegliu d'elaborar il project da fusiun cun ils commembers da suprastonza actuals. Per ina nova suprastonza communal fuss ei ina gronda sfida d'elaborar in tal project damai ch'ei basegna temps entochen ch'ina nova suprastonza ei cudischada cun ils fatgs communalis ch'ei decisivs per il project da fusiun. Tenor plan da termins duei vegnir votau davart il project la primavera 2020 e la nova vischnaunca duei ir en vigur cun l'entschatta 2021. Quei secapescha mo sche las suprastonzas communalas ein persuadidas dil project ed ina vischnaunca fusiunada purtass consequentamein dapli avantatgs che disavantatgs. Dues ei dar ina funsiun setracta ei d'in temps d'uffeci da mo 1.5 onns.

Sin fundament da quella situaziun han tut ils commembers dalla suprastonza communal decidiu da star vinavon a disposiziun per l'executiva ed aschia accumpignar il project da fusiun. La suprastonza communal ei dil meini che quei ei la megliera decisiun ed en favur da nossa vischnaunca. Ei spetga in intensiv ed impurtont temps per il futur da nossa vischnaunca e la suprastonza communal sestenta da liquidar tut ils pensums che spetgan cun bien maun ed en favur da nossa communitad.

La suprastonza communal supplichescha per enconuschientscha e spera per capientscha per igl agir.

Nominaziuns novas

Tenor art. 21 dalla lescha da votaziuns ed elecziuns san ils vischinadis ni gruppaziuns da silmeins 15 votants far nominaziuns da candidats per scadin post che stat en elecziun. Tuttas propostas per la gliesta ufficiala ein d'inoltrar a scret all'administraziun communal entochen ils **15 da mars**. Sin giavisch tarmetta l'administraziun tier ad interessents ni gruppaziuns gliestas per nominaziuns. Scadina proposta sto vegnir inoltrada cun la gliesta ufficiala. Las elecziuns ein fixadas sin dumengia, **ils 14 d'avrel 2019**.

Mintga vischin proponiu sto vegnir orientaun digl empren sutsignau dalla gliesta ch'el vegni proponius sco candidat per in uffeci e sto confirmar quei cun sia suttascripziun. Las candidaturas ston mintgamai cuntener num, prenum, onn da naschientscha, liug e professiun dil nominau.

Ulteriuras demissiuns

Da uffecis che vegnan buca elegi all'urna han las suandontas personas demissiunau sin ils 31 da schaner:

a) Cussegl da scola

Bass Trudi, Sogn Benedetg	commembra
Jacomet Lucrezia, Surrein	commembra

b) Cumissiun da meglieraziun

Monn Martin, Sumvitg	commember
----------------------	-----------

c) Cumissiun da cultura

Solér Clau, Surrein	commember
Monn Gabriela, Sumvitg	commembra

d) Corporaziun casa da tgira Sutsassiala

Monn Yvonne, Sumvitg	commembra
----------------------	-----------

Relasch d'ina zona da planisaziun

En sia seduta dils 18 da fevrer 2019 ha la suprastanza communal relaschau sebasond sin igl art. 21 dalla lescha davart la planisaziun dil territori per il cantun Grischun (LPTGR) ina zona da planisaziun per igl entir territori communal cun las suadontas finamiras da planisaziun:

- a) Examinaziun ed adattaziun dallas zonas da baghegiar (zona dil vitg, zona dil vitg engrondida, zona da habitar, zona da mistregn e da habitar) ordvart ed al cunfin da territoris surbaghegiar tenor prescripziuns digl art. 15 al. 1 e 2 dalla lescha federala davart la planisaziun dil territori (LPT) e dil plan directiv cantunal (PDChant-A) dils 20 da mars 2018.
- b) Applicaziun dallas ulteriuras prescripziuns digl art. 15 LPT e dil PDChant-A cantunal dils 20 da mars 2018, en special pertuccont promoziun d'in svilup da habitadis viers dadens e renovaziun da habitadis (PDChant-A, cefra 5.1.2, instrucziuns d'agir).

Ella zona da planisaziun astga vegnir exequiu nuot che engrevegia ni impedescha la planisaziun nova. Projects da construcziun astgan mo vegnir lubi sche tals cunterfan buca alla planisaziun cun vigur legala, alla planisaziun prevedida ed allas directivas (art. 21 al. 2 LPTGR). Lubientschas da baghegiar ein duront il temps dalla zona da planisaziun oravontut da remetter sch'igl intent da baghegiar:

- basegna terren che sesanfla ordeifer il territori ch'ei per gronda part surbaghegiar. En il suadont cass astga igl intent da baghegiar buca haver consequenzas negativas per in'eventuala dezonaziun dil terren restont (p.ex. negina parcellaziun dil territori da dezonaziun ni creaziun da largias da construcziun).

La suprastanza communal resalva il dretg da concretisar da tut temps la zona da planisaziun tenor il stan actual dalla zona da planisaziun.

La zona da planisaziun vala ad interim entochen ils 14 da mars 2021 (dus onns).

Encunter il relasch dalla zona da planisaziun sa vegnir recurriu enteifer 30 dis naven dalla publicaziun uffiziala tier la Regenza (Art. 101 al. 1 LPTGR).

Sumvitg, 23-03-2019

Suprastanza communal Sumvitg

Uffeci civil Surselva

Mortori

Wieland Luis, naschius ils 20-03-1959, morts ils 06-03-2019, staus sesents a Cumpadials.

Naschientscha

Degonda Lina, naschida ils 09-03-2019 a Glion, affon da Luca e Sabrina Degonda, sesents a Rabius.

Sumvitg, 15-03-2019

Controla da habitonts

Serrada via Val Sumvitg

Ord motivs da segirtad resta la via Val Sumvitg serrada naven d'immediat sil tschancun da Val anen per tut traffic.

Sumvitg, 15-03-2019

Departament stradal

Lenna da brisch 2019

La vischnaunca da Sumvitg offerescha a vischinas e vischins la cumpra da lenna da brisch sco suonda:

Pégn

Igniu 55.00 frs/m³

Lenna da feglia

(mischedau, senza fau) 70.00 frs/m³

Il quantum da lenna da feglia (ogna e fraissen) e limitaues e vegn partius si tenor las annunzias.

Ils prezis secapeschan excl. taglia sin plivaleta. Cundiziuns da pagament ein 30 dis net. Bugen offerin era lenna resgiada, fendida e transports tochen a casa.

Interessents san annunziar lur empustaziuns a scret agl Uffeci forestal Sumvitg, Via Quadras Su 10, 7175 Sumvitg, ni e-mail: uffeci.forestal@sumvitg.ch, ni per telefon (081 920 25 06). Las empustaziuns ston succeder entochen sil pli tard venderdis, ils **5 d'avrel 2019**.

Bien engraziament per Vossa empustaziun!

Sumvitg, 15-03-2019

Il selvicultur da revier
Flurin Cathomas

Cumin da senioras e seniors

Invitaziun al cumin da senioras/seniors dallas vischnauncas Tujetsch, Mustér, Medel, Sumvitg, Trun, Breil/Brigels. L'idea ei da haver sper purschidas permanentas e regularas per senioras/seniors en mintga vischnaunca era pliras purschidas suls cunfins dallas vischnauncas, e quei mintgamai en in'otra vischnaunca. L'entschatta fagein: **gliendisdis, ils 25 da mars** allas 17.45 en halla Cons a Mustér cun la suandonta purschida gratuita:

- Referat d'Eveline Widmer-Schlumpf, anteriura cussegliera federala cul tema:
- «Lebensgestaltung nach der Pensionierung»
- Presentaziun d'ideas/purschidas per eventualas occurrenzias comunablas
- Aperitiv

Buc emblidar da s'annunziar tier:

Administraziun communal, Via Cons 2
Caum postal 57, 7180 Disentis/Mustér
tel. 081 920 36 36, fax 081 920 36 37
admin@disentis.ch

Casa s. Martin

La Casa s. Martin a Trun envida parents ed enconuschents da nossas cussadentas e nos cussadents sco era vischinas e vischins da lunsch e da maneivel all'usitada stiva da caffè. Ina vasta elecziun da bunas pettas ed autras bunas caussas ei garantida. Quei dumengia, ils 17 da mars 2019, naven dallas 14.00–17.00. Vossa viseta fagess plascher a cussadentas, cussadents e persunal.

Cordial envidan

meinacasa e persunal

Apparat d'udida

Gliendisdis, ils 18 da mars 2019 saveis Vus schar schubergiar e rugalar Vies apparat d'udida:

09.15–10.30 en Casa sogn Martin a Trun
11.00–11.45 en Casa sogn Giusep a Cumpadials
13.15–14.30 el Puntreis, Center da sanadad a Mustér

Las firmas Amplifon cun dunna Roffler e Jäggi cun signur Gfeller sorprendan comunablamein quei survetsch gratuit per tuts interessents. Ei drova negina annunzia.

Uniun purila Sumvitg

Preziadas commembras, preziai commembers

Nossa proxima radunonza generala ha liug **gievgia, ils 21-03-2019**, allas 20:15 ell'ustria «Greina» Rabius. L'invitaziun cun la gliesta da tractandas vegn aunc tarmessa per e-mail ni posta persunalmein a mintgin. A steda participaziun envida Vus

La suprastonza

Societad da tir Vial Sumvitg

Cuors per tiraduras e tiradurs giuvens

Sco mintg'onn meina la societad da tir Vial Sumvitg era atras uonn in cuors per tiraduras e tiradurs giuvens. Separticipar san giuvnas e giuvens dallas annadas 1999-2004. Annunzias pren bugen encuter entochen **sonda, ils 23 da mars 2019**. Il menader dil cuors: Cajochen Gion, Via Plazzas 22, 7173 Surrein. 079 850 34 63 ni gcajochen67@gmail.com.

Invitaziun alla radunonza generala che ha liug **sonda, ils 16 da mars 2019**, allas 20.00 ell'ustria «Miraval». Cordialmein envida la suprastonza e cumissiun da tir.

Nus encurin in ustier ni ina ustriera per la sesiun da tir che stat avon porta. Tgi che ha tschaffen da surpender nossa ustria a Plaun Petschen duei s'annunziar tier il president. Nus engraziein gia ordavon e sperein sin enqual annunzia. Cun salids amicabels,

Il president, Ciril Cathomas

Vortrag – Wildfrucht Sanddorn

Donnerstag, 28. März, Destillaria Candinas, Surrein

Zu Fuss, ausgerüstet mit Schutzkleidern und Jutensäcken, sammeln die Hartmanns wilde Sanddornbeeren im ganzen Kanton Graubünden. In schwer zugänglichem Gebiet werden die von ihren Eselinnen unterstützt, welche die Ernte tragen. Aus dem natürlichen Vitaminspender Sanddorn pressen sie den frischen Sanbro-Saft. Margrit und Adolf Hartmann werden in der Destillaria Candinas in Surrein von ihrer langjährigen Erfahrung als Wildfruchtsammler berichten – und uns eine Kostprobe des Sanddornsirups und des Ursaftes mitbringen.

Türöffnung: 19.30 Uhr

Vortrag: 20.15 Uhr

Eintritt: Frei, Kollekte.